



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 7

Tom Cruise-i Top Gun 2 film title metetdaksü



TAPAK 9

Kashmir onük ya Pak aser India nati dang latettsüla: Sushma

VOL. XIV NO. 228 (ADOK 228)

DIMAPUR

TUESDAY

JUNE 06, 2017

5.00

Nagaland dena state 6 nung HIV mozütem temogo

Dimapur, June 5 (Agencies): India nung Ministry of Health and Family Welfare-i HIV positive putetba nisung ajak angati anepalutsü ta sangdonger ita ka süir külen, state 6 nung iba dak sendakba mozütem temogo ta osang metetdaksüogo.

State temji Bihar, Andhra Pradesh, Meghalaya, Nagaland, Maharashtra aser Delhi lir.

Mozü atemba dak alia ano Gujarat, Assam, Bihar, Uttarakhand, Mizoram, Andhra Pradesh aser Nagaland state tem nung HIV positive nisungtem indang immune levels tendangba diagnostic machines aser kits mali mesüra mapa meinyakba

osang sangoktsüogo.

Taküm May 24 nü 'National Coalition of People Living with HIV'-i National Aids Control Organisation (NACO) dang mozütem aser services akhi ama agüjang ta shidi ka zülü.

Shidi nungji, shiranger karbo mozü alitsü atema pei indang senti osettem aser rongsen yokdokba osang angazüker, ta zülua liasü.

Antiretroviral medicines ji anogoshia mapang tatakzük ka nung achitsüla aser doctor temi shirangertem dang mapang shitak nung mozü achitsü atema 'alarm clock' amshitsü ashir.

(Maneni tapak 12 nung...)

WED nung DMC-i dustbins alem

Dimapur, June 5 (TYO): World Environment Day den külemi aser ano Swachh Bharat Mission kübok linük nung dry & wet waste bendangba maparen nung shilem ka ama Dimapur Municipal Council (DMC)-i Hombarnü angati dustbins alemba sentong ka agi.

Iba sentong ya DMC office complex nung ayongzuka agi aser Dimapur kübok colony/council ketdangser nem dustbins lema agütsü.

Sentong nung Swachh Bharat District Ambassador, Geoffrey Yaden-i o jembidang, asenoki asen temeket merüka

ayutsü atema tebilemsü khuret abentsüla aser tangar-a ajungmesotsüla ta ashi.

Swachh Bharat Mission alizung tongtetsü atema lokti nung lennirtemi iba mapatong nung dener shilem agitsüla, ta paisa ayongzük.

Brand ambassador ka ama onoki lokti lennirtem den külemi inyaksüla aser Swachh Bharat Mission kübok Dimapur nung metsümeshidak 400 yanglutsü sentong lir. Anungji, iba dak sendakba nung nisung ajaki SBM den amalitepa yariteptsü mepishir, ta Geoffrey Yaden-isa shisem.

(Maneni tapak 12 nung...)

Kohima nung tilatanurtemi süngdong atem



Kohima nung June 5, 2017 World Environment Day nü Cross Pre-School ketdangsertem den tilatanurtemi süngdong amer agiba noksa nung angur.

Kohima, June 5 (TYO): Nagaland yimtiba Kohima nung tanü World Environment Day (WED) nung tzümpung kümzuka aser wazuka ayutsü atema tenangzükba agiba dang masü saka tesem balala nung süngdong atemba den merükmeju mapa balala inyaka mungogo.

Taküm omen "Connecting people to nature" nung ajemdaker, Cross Pre-School Kohima nungi arishi küm 4 tain kaketshirtemi Old Age Home, New High Court Complex nung süngdongtem atem.

Parnok den tesayurtem aser

Cross Wonder Church nungi lanurtemi yaritepa liasü.

"Onoki tanurtem dang World Environment Day indang tetezü chichiba angatetdaksünür. Iba jagi tanurtemi süngdong atemba nung ozü lanurtemia yaritep" ta Cross Wonder Church Kohima Senior Pastor, Rev. Ketou Theünuo-i ashi.

Angami Youth Organisation (AYO)-ia tzümpung kümzuka aser wazuka ayutsü atema mezüngbuba shilem mapa inyakkang, Kohima jila nung süngdongtem temyonga senzü.

AYO tir Neinguvoto Krose-i

ashiba agi, parnoki State Civil Secretariat tesem nung temulung agüja iba mapa inyak aser parnoki Secretariat Park merüktetba dang masü saka tobur tajung süngdongtem atem.

AYO kübok yimtsung aser tzükong unit temia pei pei temeket nung süngdongtem atem.

State sorkar ajungmesoa AYO züngsemtemisa Town Hall Kohima yangluba kimung merükteta liasü. Iba ki ya yanglutor joko küm aika süia arur. Parnokisa Kohima jila tesem balala nung merükmeju mapa inyak.

Meimchir merumeruba agi alima tzümpung raksar: Dr. Imtiwapang Aier



Department of Environment Forest & Climate Change, Nagaland-i ayongzuka yangi Mokokchung Town Hall nung 'World Environment Day' sentong tulu ka "Connecting People to Nature" omen nung ajemdaker amungdang tongti tesemdanger Nagaland Legislative Assembly Speaker Dr. Imtiwapang Aier den par külem medemer aser sorkar ketdangsür kar densema noksa nung angur. Mokokchung, June 5, 2017

Mokokchung, June 5 (TYO): Alima tzümpung tamajungba akümba ya talisa meimchirtem tali merumeruba ajanga lir, ta Nagaland Legislative Assembly Speaker Dr. Imtiwapang Aier-i Hombarnü Mokokchung Town hall nung 'World Environment Day' amungba sentong ka nung jembidang metetdaksü.

"Tanü alima tzümpung ya tamajung dang akümer, ibaji tongtibangsa asenoki süngdonglidongtem mashimashi tsüngtokba den meimchirtemi tali merumeruba ajanga lir", ta ashi.

Tang aoba amai dang ora alima nung aliba süngdonglidong aser shirurutemji aika samadoktsü aser meimchirtem

tali majungtsü, ta paisa scientist-temi bushitetba kuli kar bener arua lemsatepa liasü.

Kümshi June 5 nü sentong balala ayonga 'World Environment Day' amunger saka kidangi orbo asenoki alima tzümpung indang ya amadoker, anungji, ibai süoki ia agitsüla, ta paisa ayongzuka ashi.

Alima tzümpung wazuka ayuba wadang ya sorkar aser telok kari dang inyakba agi makoktsü, aji oda, "nisung shiai khuret süa shilem agitsüla aser anogoshia ibai asen mulungjang nung yur alima asoshi bilema inyaksüla", ta paisa shisem.

Tarutsü lanu putu tajungba aotsü asoshi tanü asenoki inyaka

yutsütsüla aser Mokokchung ya "pollution free district" ka ta sangdongtsüla, ta paisa inyakdaksünüba o ka ashi.

Tanü guest speaker Parl. Secy Dr. Benjongliba Aieri jembidang, akhidangbo Kohima aser Mokokchung-ji mopung jangratemsüka liasü, saka joko tanübo fan aser refrigerator amshitsüsa akümer. Aji oda, Nagaland tesem aika nung tzü akonger, süngdonglidongtem nung narö maponger aser tejang junga matanger, shiruru tapu balala tim masüba mapang pokteter, mopung aonba aser tsünglu aruba yimya melenshiogo, ta alima balaka akümba indang kuli kar ashi.

(Maneni tapak 11 nung...)

VOTE
FOR THE ONE WHO HAS
PRINCIPLES
INTEGRITY
CHARACTER
AND
DEEP PROFOUND LOVE
FOR
THE PEOPLE



Office of the
IMCHEN KIDONG MUNGDANG
H.Q Mokokchung Town
SANGDONGER


Imchen Kidong Mungdang menjenti ajanga kanga dang rongdak nungdak kar lemteptsü atema Lenla Senden ka jateper. Anogo 9th June 2017, Mapang- 10:00 AM nungi tenzuka IKM Treasurer Y. Lanu Imchen kidang amentsü. Anungji, Unit aser Yimtsung ajak nungi nübu asem (3) bosa arua iba senden nung adentsü metetdaksür.

Iba osang kaket nung adokdaksüba dak alaka tanga information meyoktsü.

Sd/-
President, IKM

Sd/-
Secretary, IKM

Nanung ayong, Mongsenyimti nung 'Angling Festival' tenzükogo



Mongsenyimti (Mokokchung), June 05 (TYO): World Environment Day den mapang sütepa Meyilenden Valley Fishery Welfare Society (MVFWS) den Anglers Association Mokokchung (AAM)-i senteper tanü Mokokchung district kübok Mongsenyimti nung aliba Nanung ayong awatsüng nung AMM Executive züngsem aser MO Chest & TB Hospital, Mokokchung, Dr Takosunep-i hopta ka piyong ango apuba Angling Festival tenzüksüogo.

Nanung ayong nung tziü tepdanga yangluba awatsüng ya

tasazük Sq/meter 500 shi lir, aser yangi ayong ngo tapu aika lir.

Iba awatsüng ya Mokokchung town nungi kilometer 24 shi aser National Highway 61 nungi kilometer ana ser tesadang shi lir. Iba awatsüng ya Meyilenden Valley Fishery Welfare Society (MVFWS), Mongsenyimti Village-i achaayanga repranger.

Nanung river Angling festival tenzüksüdang Dr Takosunep-i angling festival ayangzokba atema Mongsenyimti village aser MVFWS dang pelaba metetdaksü.

Paisa, angling ya eco-friendly saisapong ka lir aser iba ya ajaki ajungshitsüla, ta metetdaksü.

Ayong nung ango aputsü atema bomb, mozü balala aser battery mamshitsü ajungshia pai, item ama inyakyimji 'unsustainable' dang masü saka mapang talangka nungbo

biodiversity nunga kongshitsü, ta metetdaksü.

Kasa sentong nung Mongsenyimti village tenüng nungi 'Putu Menden' lenir katia Nanung ayonglen terenlok mapatem inyaksüba atema pelaba lemsatep.

Paisa ali kiburtem dang, kenü anogobo Nanung ayong tesem ya Nagaland nung tourist tesem ka akümtsü atema sorkar agency tem den amalitepa inyaksü ayongzük.

Iba sentong ya MVFWS chairman, Sentitongzuk Pongen leniba nung agi aser Mongsenyimti Compound Baptist Church Pastor-i Tsüngrem temoatsü meshia sarasadema liasü.

Iba Angling festival ya hopta ka piyong akatsü, aser iba festival nung Mokokchung aser tanga district tem nungia ango aputsü janrgrar aikati arua shilem agitsü imlar.

TENÜNGSANG AGÜTSÜR

Ozü Mangmetong Arogo nung jala Rev. **R. SANGYULEMLA IMCHEN** Asso. Pastor (Women) ajanga teindang aser bendanga agütsüba tanela bener ajemalua küm 25 shi tenzüka arur, tenzükba jenjang nungbo temeshitiba/tematiba tenüng (Reverend) ABAM ajanga 20th May, 2017 nü la nem Reverend ordination agütsüba atema la aser lar kibong nem Imchen Kidong Mungdang "A" Khel ajanga tetushi tulu agütsüba den, iba jenjang tongtetsüsa Tsüngremi la aser lar kibong len aniba atema Tsüngrem tenüng asanger aser Mangmetong Baptist Arogo danga kanga pelar.

Iba temeshi tenüng ngutetba ajanga ozü Arogo nung dang masü saka nüngdakba mapang aser tesem ajak nung Kibuba tanelar lu tuluba aser tajetba inyaksü, tzüra-a aser sama-a aliba santhem Kibubar kidangi anidenba nung shilem tuluba agitettsü ozü kidong puri imla-a aser yongya-a sarasadema atar.

Sd/-
TEKASASHI IMCHEN
Chairman
Imchen Kidong Mangmetong "A" Khel

Sd/-
ARIPONG IMCHEN
Secretary

ANSCU senden ayonger

Dimapur, June 05 (TYO): All Nagaland College Students' Union (ANCSU) tribunals aser Executive züngsem ajak dang 2015-17 küm atema 10buba Executive Council Meeting June 7, 2017 nikongdang 1:00 ako nungi ANCSU Office nung

amentsü, anungji iba senden nung tribunals aser executive züngsem ajak medema arua adentsü metetdaksür, ta tanü ANSCU Publicity & Information Secretary, Imnameren N Jamir-i sangdong ka nung metetdaksü.

June 05, 2017 - World Environment Day



Longsa-Ungma yimnasangeri anepaluba Tzüla (Dikhu) Green Zone Project Management Committee-i ayongzüka 7 buba "World Environment Day" sentong ka "connecting people to nature" omen nung ajemdaker TGZPMC kimen kidang agir külen shilem agirtem külemi tangokba noksa nung angur. Iba sentong nung TGZPMC-isa Ungma nunger Pangjung Jamir jabaso Okten Jamir-i NBSE-i agiba tatidang HSLC nung top 20 jenjang ngutetba asoshi tenüangsang tetushi nungo kakat ka den sen 10,000/- agütsü aser pa ya TGZPMC atema ambassador asütsü sangdonga liasü. Mokokchung, June 05, 2017.



June 05, 2017 nü World Environment Day anogmung nung DUCCF-i ayonga anepdang 6:00 nungi 8:00 ako tashi Dimapur municipal kübok colony tem nung nübodok mapa inyakogo. Noksa nung DUCCF züngsemtem aser temelunger kari DC office complex merüktetba sülen tangokba noksa nung angur.



Wokha, June 05, 2017: June 05, 2017 nü, World Envimoment Day anogomung nung Mt. Tiyi arem nung süngdong atemba sülen ketdangsertem aser temelungertem tangokba noksa nung angur.



Tuensang, June 05, 2017: June 05, 2017 nü, World Envimoment Day anogomung nung Tuensang ADC, Jeelani Samoon-i ward ketdangsertem nem jana indokba 'dustbin' lemstüba noksa nung angur.



Dimapur, June 05, 2017: June 05, 2017 nü World Environment Day anogomung nung Ao Yimküum Youth Organisation, Senjum Village Youth Organisation, Kashiram Youth Organisation, Kacharigaon Phevima Youth Organisation, Industrial Estate Colony Youth Organisation, Indisen Youth Organisation aser Rilau Youth Organisation nungi lanurtemi State Stadium Dimapur nung nübodok mapa inyakdang tangokba noksa nung angur.



Miss World Japan-i Assam semdangtsü



Guwahati, June 05 (Agencies): 2016 Miss World Japan Priyanka Yoshikawa Eastern Himalayan Naturenomics Forum-2017 nung shilem agitsü asoshi Assam semdangtsü. Iba sentong ya November ita 2 aser 3 nü akatsü.

Priyanka ya certified shiti

trainer ka lir aser shite tem anepalutsü asoshi lai inyakner. Lai iba sentong nung 'community conservation' aser 'living in harmony with nature' onük nung ajemdaker jembitsü. Lai India, Japan aser Asia nung eco-elephant tourism ajungkettsütsü asoshi imlar.

Maneni la ya 'Me for the World' charity savings bank box brand ambassador lir. Iba sentong ajanga tanurtem dang sen rizünga yur alima asoshi langka tajung inyaksü atema ajungshir. Lai Assam semdangba mapang school balala semdanga kaketshirtem den sensak asemtsü.

Ulfa-I züngsem ka bendanga agütsüogo

Guwahati, June 5 (agencies): Ulfa (Independent) nung züngsem Ron Asom Deobarnü Dispur yimti police matsüngdang bendanga agütsüogo.

Assam police osang ka ajanga ashiba agi, telungpursangya shirangba ajanga iba telok toktsü. Ron ya

Nalbari district kübok Tamulpur tesem nungi lir aser maneni bushisüngdangtsü atema pa special bureau ka nem agütsüogo.

"Pa iba telok nung 2011 dena liasü aser Nagaland nung par telok indang camp nung lia liasü. Pa iba tesem nung longren ka nungi tsüka yiruba nungi

temang mejungi aküm," ta osang ajanga metetdaksü.

Kasa mapang nung Noonmati police-i totzü shibelener ana puogo. Shibelener ana ya Noonatia aser Sanjay Ghosh ta jangjaogo aser tena ya jila nung diesel totzü shibelenba nung shilem agiba atema aija apu.

Harsh Vardhan Shringla-i train lenmang ka yanglutsü asoshi benok

Agartala, Jun 4 (Agencies): Dhaka nung India nung High Commissioner Harsh Vardhan Shringla-i Tripura sorkar dang tang Agartala - Akhaura train lenmang mesüka South Tripura nung Belonia tesem ajanga Tripura aser Bangladesh na sendakteptsü asoshi train lenmang ka yanglutsü atema achaayangtsü asüngdang. Yashi nikongtsütsü Agartala semdangba mapang Shringla-i Chief Minister Manik Sarkar den ajurutepa liasü aser Tripura aser Bangladesh na tsüngda shishilembaba aser terenlok maparen balala dak sendakba jembishinütsü atema Chief Secretary Sanjeev Ranjan aser tongtibang ketdangsertem den senden ka aka.

Shringla-i osangbenertem dang ashiba agi, Tripura aser Bangladesh na tsüngda tesendaktep akangshitsü asoshi Feni ayong nung apu yanglutsüba, Agartala- Akhaura Rail project aser Bangladesh nung Ashuganj dena tanga port tem nung temelaba agütsütsü asoshi tebilemba ken o tem Chief Minister den jembishinüa liasü. "India aser Bangladesh na tesendaktep temaba jenjang tongogo aser iba ajanga linük anaprongla tejakleni aoba nung yarir. Ajisüaka Belonia ajanga Bangladesh den sendakteptsü asoshi train lenmang yanglura iba ajanga nüburttem tali sendakteptetsü aser shishilembaba tsütsü tali renloksü," ta Shringla-i ashi. Pa

yashi Akhaura Check Post ajanga aru aser tanü Bangladesh-i meyipa ogo.

Linük ana tsüngda tesendaktep tajungba küma yanglushitsüba ken o jembidang state sorkar ketdangsertemi ashiba agi, sentongtem ajak ataloka ora Tripura aser Chittagong na sendakteptsü asoshi Sabroom tesem nung Feni apu Indian external affairs ministry-i teyari agüja taruba ita nungi yanglu tenzüksü. Iba apu yanglutsü asoshi Ahmadabad nung amenoker aliba construction company ka nem nongloksüogo. Iba apu aser iba den sendaktepa lenmang yanglutsü asoshi ita 30 shi agitsü, ta ketdangsertemi ashi.

OFFICE OF THE YIMJENKIMONG NOKMAJIBA RAZUK LEMTUR KIDONG

BPO: ALONGKIMA. MOKOKCHUNG: NAGALAND

TENÜNGSANG AGÜTSÜR

Mr & Mrs Lolenliba Lemtur aser Angangla Tsudi jala Nungshienla Lemtur W/o Meyalepden Tsudir, Ao Senden Literature Board-I achayanga agiba tatitang nung Post Graduate Diploma 2016 nung tematiba jenjang nguteta Jemtimenba Mollier Foundation award anguba atema tenüngsang aser tetushi agütsür aser talisa Tsüngrem tenüng asanger.

Tsüngremi la wadang maneni moajangma.

Sd/-
LONGCHATONGBA LEMTUR
President

Sd/-
IMTICHUBA LEMTUR
Secretary.

NSCN (K) pur ka Manipur nung khaset

Imphal, June 5 (Agencies): Hombarnü sepaitemi National Socialist Council of Nagaland (Khaplang) nung self-styled "Major" ka khasetogo, ta police-i metetdaksü.

Iba tatalokba ya tanü Imphal East district kübok Khoupum tesem nung atalok. Tasüsang ya G. Thanmei ta jangjaogo aser pa ket nungi M-16 rifle ka aser injang 11 ngutet.

Police temi ashiba agi, itangitertem nung iba tesem nung prangbong injang bener nisungtem monga aliba osang Deobar aonung iba tesem meketbang. Telungpurtem aliba

tesemi Gorkha Rifles pur aoba sülen telok ana tsüngda khatempa liasü.

Iba tatalokba nung Thanmei khaset saka pa den külemi alirtem jena oadok. Telungpur jena aoertem rongnung kar bo yirur alitsü, ta police-i ashi. Iba lendong nung sepai bo kata meyiru.

NSCN(K) pur aser India sorkar na 2000 küm 'ceasefire' asütsü asoshi tezüngzüktepba ka agi saka iba tezüngzüktepba ka 2015 March 27 nü raksaogo.

2015, June 4 nü Manipur kübok Chandel district nung sepai 18 khasetba ya NSCN(K) pur dak tongloksü.

BJP puri masü Garo nungertemi Hindu nung kumzüka ayur: Marak

Tura, June 05 (agencies): Bharatiya Janata Party (BJP) toktsüba sülen taoba mapang telungpur aliba politician akümsang Bernard N Marak-i maneni BJP pur aija parnok indang onüktemji lokti tuluba kati magizüker ta ashi. Paisa ashiba agi BJP puri masü saka Garo nungertemi iba tesem nung Hindu pur taginüba aser tejangrabatem kumzüka ayur. "Putu aika Garo Hills nung BJP puri masü saka Garo nungertemi Hindu nung lokti kumzüka arur. Hindu nungertem Tura Samshan Ghat ken o mapang mesüra parnok tenüng electoral roll nungi indoktsü dang BJP pur maliasü," ta Bernard-i ashi.

Taoba BJP züngsem-isa ashiba agi BJP pur onüktem Garo Hills nung meindaktsütsüla.

"Iba ajanga Garo Hills nung kin tilatem atema tetsükdaktsü adoktsü. Garo nung ya Hindu nung medemer lir aser parnok Garo nung tesem nung alir asünung parnok kumzüka ayutsüji Garo nung teinyaksü lir. BJP puri Garo nung anemba jangjaogo aser parnok miim onüktem ajanga Garo Hills nung Garo nung masürtem aika ki maka akümtsü," ta paisa ashi.

BJP küm asem ajungba benjungmong nung nashishi achiba benjung ka ayongzüka akaba aikati aitsüogo saka Bernard-i ashiba agi, iba ya parnok bejong amongdang

benshiba sobaliba ka lir. Maneni iba maparen ya BJP pur ya Garo nung anema asü masü ta jangjatsü asoshi inyakba liasü.

"Parnoki ozü lima nung nashishi nokdangtsü merang aser iba ajanga nisung aika temolung yirutsüogo," ta leneir-isa ashi.

"Iba dak sendakba nung ola madokra iba ajanga tamangba yimsü balala amangba nüburttem tsüngda mangatettep adoker lila. Onoki tamangba yimsü ajak akhümtsübur, kechiba BJP pur onok yimya aser yimsü akhümtsübu masür? Onok lisopurtem aser BJP pur ya ainertem lir. Onoka onok ozüng lir aser parnoki ibaji akhumtsübut nung jungla. Hindu nungertem parnok temeden Garo Hills nungi kodanga magien. BJP puri lokti nung telemsa adokdaksüba dak alaka kecha tajung meinyaker," ta paisa ashi. Taoba BJP züngsemi maneni BJP pur nem vote magütsütsü asoshi lokti ajak dang kumandangshitsü atema metetdaksü.

"BJP pur nungita meyari tsüngda, lokti ajaki Garo Hills nung asenok tang tashi lia aruba nung jangratemtsü ali mali ta asüngdangtsüla. Yimten yimsütsüba dak ajemdaker BJP pur nem tamangba yimsü kecha meprokshidaktsü tajungba asütsü," ta Naraki maneni shisem.

GOVERNMENT OF NAGALAND

DIRECTORATE OF LABOUR

NEW CAPITAL COMPLEX, NAGALAND :: KOHIMA

NO.LBR/ESI/SEC-90/2017

Dated Kohima the th May' 2017

CIRCULAR

This is to inform to all Owners/Employers of all Factories, Industries, Shops, Hotels, Restaurants Newspaper Establishments, Educational Institutions, Medical Institutions, etc., registered under ES Scheme, to display on the Notice Board the following particulars of concerned ESI officials in their respective workplaces to ensure easy access of information to the registered IPs w.e.f the date of publication of this circular:

- | | |
|---|---|
| 1. Administrative Medical Officer (AMO) | : Dr. Z. KHeshito ZhiMo, Mobile No.9436006641 |
| 2. ESI Scheme Dispensary, Dimapur | : 03862 242716 |
| 3. Insurance Medical Officer (IMO) | : Dr. Tovito L. Awomi, Mobile No. 8415846724 |
| 4. Branch Manager, ESIC Branch Office Dimapur | : Shri. Mario Manihrii, Mobile No. 9774020088 |
| 5. ESIC Branch Office, Dimapur | : 03862 242723 |

Sd/-

Er. L. Nungshiyanger Aier
Labour Commissioner
Nagaland Kohima.



TIR YIMYIM

YIMOBILEM (EDITORIAL)

DIMAPUR TUESDAY, JUNE 06, 2017

TAMANGBA YIMSÜ ANA TSÜNGDA

Nagaland nung asenok Khristan-tem ya Hindu nunger o Muslim nungertem na tsüngda samatsü amai lendongbang ka nung lir. Asenok Khristan akümba ya onsara tia ajung, kechiyong asenokang asenok menen asoshi sür shia aruba Tsüngrem chir Yisu Khrista dak amangertem lir. Ajisüaka, Khristan asütsüba ya temela masü, kechiyong iba yimsü ya pei linütsü alitsü aser pei inyaknüsü inyaka alitsüba yimsü ka masü saka peisasa azüoka alitsü aser timtem lendong aser sensak tia ajak tizükteta alitsüba yimsü ka lir. Atangji, ibai tangar tenzüka aser tangar dang temeim sayuba yimsü, anungji ajak den putepa litettsüba yimsü ka lir. Ibayongji, alima aika nung Khristan-temi kaketreju tajung lapokja nisungtem nüchi kümdaktsür aser mozü ki tajung aika lapokja nübortem nem taneptsü agütsür. Iba ama Khristantemi inyakba mapatem nungi tajanzük agia lenir tajung akümba Hindu aser Muslim nunger aika lir. Aji oda, tanü Hindu aser Muslim nungertem education tajung ngur yimsüsüba aser ketdang süba jenjang tajung nung amenertemji Christian school, College aser Univeristy nungi züngtettertem lir. Iba kasaji alima tesem balala nung Khristantemi lapokba mozü kidang jenjang dalang agi taneptsü angur aser ano tesem balala nung Khristantemi temeim mapa inyakba ajanga sensaker aser makamaitertem aika anisüngzük ngudagi. Aji oda, Khristan yimsü yabo tanüla tekümtet agütsüba yimsü ka dang masü saka shi temang nüngdaka dena ngua nüchi kümdaktsüba yimsü lir. Ibayongji, Khristantemi süng long aser ita anü dak mamanger saka süng, long, aser ita anü yanglusang Teyanglur Tsüngrem dak dang amanger. Ajisüaka, tanü alima nung Khristan purtem mereprangner aser Khristan yimsü anemer telok aika adokogo. Aji oda, alima tesem aika nung Muslim nungertemi Khristantem anema apusoba asenoki angur. Iba kasaji India nung Hindu nunger telok aikati Khristan purtem anema inyakba mapatem anogo shia tesem ka nung mesüra ka nungbo atalokdagi. Joko, India nungbo yimteni Hindu nunger shinga Khristan akümtsü memelar aser Hindu nunger temulung meyipa Khristan akümertem dena tanaben Hindu yimsü agizüka amangtsü ajungshiteper. Iba ama mapang ka nung Hindu yimsü keta asenba telok BJP teloki Center nung dang masü saka state ajak nung yimten tashi agia aotsü merangba mapang lir. Aji oda, state nung BJP government nung aküm nung dang Nagaland nunga terenlok mapa inyaktsütsü ta BJP lenirtemi jembiba angashir. Ibaji "nai apudaker ni külemra, item sentsüwangshi alima yimli (government) ajakji nü nem agütsütsü," ta Satani Yisu dang ashiba mesüka lir. Atangji, center nung yimsüsüba teloki ashi angaba nung alima yimten tashi aser senotsü teyari melamelaa angutsüa akok, saka Jim Reeves-i atenba ama, tang ya asenok asoshi "Hon dang nungibo Yisu-ang shimdi aser yimli ka madak chuba asütsü agibo Yisu-ang shimdi," ta atentsüba mapang lir ta bilemer. Ano, külen iba dang nungi tuluba lendong kaji asen lima ya asenoki meteta aser memeteti Muslim nungertemi atsüngbangdagi. Joko, parnok maden asenoki kecha meinyaktet kümogo. Iba amai lia lia 2070 küm tashi nungbo Nagaland for Christ lima ya Hindu mesüra Muslim lima-ang ka akümtsü mesüka lir. Talisa tang asenoki ngua Europe nung France aser UK ama tashitait lima nung Muslim nungertemi yimten tashi agiadoker lisopurtem mulung animesüngzükteni alitsüsa kiralongrartemi amokmerenba angur. Item tashitemetettertem limatem nungji küm ishika jakdang mapa inyaktsü asoshi Muslim nungertem jaoka lidaktsüba purtem tanübo senso kümer, Europe lima ajunga Muslim lima akümtsü merangba tensa mapang ka nung European nunger liso purtem timtemdagi. Asen jakdang asenoki ataloka anguba lendong timtem mapatem nungji tan ser asenoki tangar bendangertem dak metaloka malitsüla aser rongsen aser alima yimli arishia asenoki Yisu toktsür maotsüla. Aji oda, Khristan-ji Khristan ama asenok tamang nung akangakanga nokdakra, alima nung senmang küma agitsüba rongsen aser yimlijibo iba tamangba nung jagi dang angutsü.

OLEMSABANG

TEMOATSÜ ANGU, KANGA TSÜBU, ATENTEN, MEJANGA MELITET

- Imdang Ozüküm. E.Er.BSNL

Küm 30 ji ka süiogo, kanga meranga inyakba asangur chanu ka, pa tasoli toktsür Dimapur nung school azüngtsü tsürabur nungi pilar arua bara ki tila ka mesemteta liasü. Oda oda pai Autorickshaw anishia sen lenmang bushitsü pai mulungtet, kinungertemi pa dak kanga meim aser temulung toka liasü. Pai meranga ayanger Auto tejen ka alia anishitsü tenzüka. Iba mapang anogo nung Auto ka jagi teimtiba agi sen Rs 150/- kanga meranga aabaji liasü. Ajisüaka pa aji agi kanga temulung süa liasü aser khen hire asüba nung Rs15/- ang liasü. Anogo shi pai anepdang nungi nikongtsütsü mangsema Auto nungji senzülü kidangi arua tzü chikoshir sorochioka chiyunger tanü sen kwika aazük ta züngdanga kanga temulung pela-a chiyongshir mejangli ta asü. Kecha shisabulu mali. Iba mapang nung Dimapur nung sen Rs 10,000/- agi ali dalang town area nung alitsü koka aliba mapang liasü.

Kenü anogo tzümar ka pai ajuru, tzümarba jagi pa dang jaka ka nung ki kadi meinokjang ta Auto ji hire asütsü mepishi. Aser pai iba tzümarba ji meinoktsütsü Autoji atemlok. Iba tzümarba ya dhoti agir aser chapel ka semer tola temesüng talangka semer liasü. Ibai nikongtsütsü teraa mangsemer liasü. Tzümarba anentsüba jakaji tonger tzümarba jagi baraji agütsü, pa kidangi meyipa shilang. Kodang pa ki atong pai Auto tesülenji juli ka angu. Aser juliji lapoka reprangdang nung idakji sen Rs 1,00,000/- (Rupees one lakh) inoka liasü.

Pai bilem ni joko takar kümogo, aser ibai tzümarba indangtoa, ni mapang tatsükabo Auto ya mamshi-i kidang dang ayutsü ta sür merang süngden ka nungji telonglenji senji lemer süoshi agi nempanger chi chiyongshir yipteni ai. Kodang yipten nung ondak pai tsübuait, aser tzümarba to bilemtet, aser ano iba sen yagi kechi inyaktsü (?) ta külen bilemer, ano ibai tatidang ka aruogo ta bilem. Pa aonung sangwatsü yongyaseta amuo moi iba aonungji tzümarba aser iba sen jagi pa timtemdaksü. Lipok 12:11-20 tiyazü jembiba ajanga Egypt Chuba Abrahami shisabulua aonung sangwa amuo modaktsü amai. Temenen sen kidang aliba jagi kanga shisabulu tena pa kangshi. Yisu denbo shisabulu maka, tetsübu mali, ta angateter.

Kodang sangwaa aküm pa memejangi sangwa yongyabaji kechi atema? Pai ibai temenen tatidang ta pasasa pa tebang nungi memeteti ola adokadok, aser pai senji merang süngden tilaka nungjagi agitet aser pai Auto Box nungji inok aser yasüng chisüngji nümdanger pa timtemdaksüsang tzümar sang anendakto bushia apuso.

Kodang pa kimaji atong tzümar sangji kishi nungji metongloker ali nungji ranglokbaji marakzüi nokdaka liasü. Aser pai aja nung junga meranglok aser pai khenbo bilem, pai ni ya memetet aser majiteter, anungji odang oatokdi, ta sür Auto jagi tua amen, saka pa mulungi senji tagi ta pa den jembijen jembi. Anungji pa Auto nungjagi ano alur tzümarba dang ya nü sen yasüng kü indang Auto nung toktsüba to nü dangi bener arutsür, ta sür agütsü nung tzümarbaji aoksa, aser pa den salem aser kecha senji mezüngdangi Hotel kati anir ao.

Saka pai mechiyongtsü ta ashi saka tzümarba jagi kechi südir süaka külemi chiyongtsü ta ashi saka pabo bara senzütsü temenur ta sasasete mapang aobaji bilemer, saka tzümarba jagi chiyongtsü tajungtiba meshi aser jangratema tena pelatepa chiyongtep, pai bilem, tanübo langogo, tetezü chiyongba jagi kangasa periogo ta bilem. Ano tzümarba jagi pa atema shisabulutsü ka agütsü pa nem sen Rs 20,000/- atsüteter tepela agi agütsü. Anungji pai magitsü ta tekong meranga nokdak, khen ashitsübo asangur chanu ya suwar amai ta ashitsü koka lir, ano Rs 10,000/- agütsü, ajia magitsü ta ashi. Anungji tzümarba jagi yabosa agitsüla ta sür Rs 5000/- agütsü (joporjos) agi. Aser pa dang ashi, na timtem nung onoki yaritsü anungji iba address nung phone nung ring süang ta sür phone number agütsü aser tzümar jagi ashi, Naga nunger kanga junger (Naga admi pohod aja hay) ta shia tena pila saka ajiser mobile phone maliji mejembitet. Iba mapang pa nem agütsüba sen Rs 5000/- ji tang Rs 50,000/ jenjang asütsü. Kanga temulung asü. Aser kidangi meyipa aru.

Ni ka asübo, Half Nagarjan nung ali bika ka, Super market nung bika ka, Purana bazaar nung ali bika ka, Kohima nung summer atema ali tilaka aserbo distance nung tzülu den ango tzübu aliba ka enjoyments atema ta alia dang yabo jangratema lila.

(Maneni taruba adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

American Missionary Jacob Thomas Brahmaputra Ayong Nung Tepsetba

~ Tiala Imchen, Dimapur.

(Taoba adok nungi...)

Sadiya aser temeket nung maneni tensa majungba agi Sadiya toktsür tesem ka nung Mission Station mesemtsü mulungtet. Miles Bronson-er kibong par medemer Thomas Brahmaputra ayong nung tepseta bendangli Sadiya nung rema yur temulung zürepa liaka iba jagi parnok mangdang mesamadaktsü. Saka kasa nukla yur Jaipur-i arua Mission Station tasen lapok. Iba Station ya Naga kintem anasa aser tesüiba mapang parnok Burma aser Assam na tsünga aliba tenem kintem dangi Osangtjung bener aotsü ta jembiba indang tesem liasü. Anungji Jaipur Mission Stationji tenem kintem asoshi kanga tongtibang asütsü ta nukjidong yur Mission Station lapok. Idakji Rev. Cutter-i kaket menünga aser school sayuba nung maneni inyak aser Rev. Nathan Brown-i sayutsünga aser kaket züluba mapa inyak aser Rev. Miles Bronson-er kibong Naga nung asoshi mapa inyaktsü shimtet. Miles-er kibong Naga nung asoshi mapa inyaktsü, March ita 14, 1840 nung apusoa Namsangi (Arunachal) aru. Idakji School lapoka tanurtem anidena sayu, saka yimtsüng kar nungibo tetsübuttsü osang yok. Kechiba süra iba mapangji temesüng nungur ajak Company nisung itangiter ama bilema liasü.

Naga Mission mapa nung yaritsu asoshi Miss Rhoda Bronson America nungi May 14, 1840 nung Jaipur Tonga aru aser tedi Bronson-er kibong den missionary mapa nung yaritepa inyaktsü Namsangi atu. Saka mapang talangka melii iba yimtsüng nung shirangba wara ka arua nisung jenti asü. Aser idangji Miss Rhoda shiranga Jaipur-i anir alu aser idakji la mekümzüketi December 8, 1840 nung süa Jaipur nung dang arem. Laji Naga kin asoshi mezüngbuba Lady Missionary aser mezüngbuba tenem kin asoshi pei taküm agütsüla liasü. Tenem kin asoshi teimla tulu yur aruba to tatem küma aru. Joko Miles Bronsoner kibong Namsangi meyipa moteti Naga Mission tatembang aküm. Miles Bronson temeimtsüka par medemer Thomas parnok tarudang Sadiya nung sür alinung ano pa temeim tenu talakla dena bendangli nung par tsüraburi mungui süa aremba asükuji kangasa taku liasü ta aseni angateter. Joko par kibong Namsangi motet pai tenem kintem asoshi kanga temulung shirangba pa shiti nung yamai shia lir, "Iba talidak nungi onok tejak meyipdang onok mulung raksaa mejepi mali, samaa aliba nüburtem anepalutsü asoshi onok sülen shinga metoktsür".

(Taruba adok nung...)

ANOGO ABEN TSÜNGREM DEN

MEJA NUNGI ANGAZÜKANG

"Kü pelaba süngdaksütsü asoshi nenoki puteta liang, kasa temeim akatsüla, taküm telungjem liang, aser kati ka den pute pang." Filipi 2:2

Kodang meja to reprangdangdir parnok teti agia telok dang alir. Mongintemi ashiba agi meja telok ka nung meyi roker nungi toker tashi alir- parnok kijai inyaka malir- parnok kati ka nungdaka alir. Süra kodaser meja paikaji külemi inyaksü akoker? Mejai mapa ajakji telongjem nung inyaker. Mejai shiaji tebilemba ka, nukjidong ka aser sentong ka sür alir. Mejai kechi koda pei meten malir yangji tamangertema lir. Mejai kechi koda kati ka nungdaka alir yamaji Tsüngrem chirtem asoshia lir. Parnok külemi lia nukjidong ka aoshi aliba ama tamangertema yamaji alitsü nungdaker. Asenok ajak nukjidong kaji Tsüngrem sentsüwangshidakja pa O sangdongba, Tsüngrem meima kati ka den meimtepa alitsü. Tsüngremi asen jakdang toktsüba wadangji külemi nukjidong ka nung pa dang tashi anga tempangtsü aser ibajagi ajak moatsüdi.

SARASADEM:

Kibuba, onoki kati ka taoba ta tushitepa na asoshi lidakjang. Amen

Arogo balala nung 'World Environment Day' amungba



Tzüdikong, June 5, 2017 : Alima tzü mopung merüka aser wazüka ayutsü tangatetba lemsatsü asoshi Tzüdikong Baptist Arogo-i acha-ayanga Zion School, Tzüdikong nung World Environment Day 5th June 2017 nung mongogo. Kaketshir den külemi tesayur ajaki school temeket merüka süngdong aser nara tema yutsü. "Alima den sentaktepba alitsü" onük nung ajemdaker Headmaster Mr. Imsuyanger Jamir-i kaketshir aser tesayurtem den jembi.



Yisemyong, June 5, 2017 : Yisemyong Baptist Arogo den yaritepa State Agricultural Research Station (SARS)-i "Connect With Nature" omen nung ajemdaker "World Environment Day" sentong tajung ka ayongzüka mungur külen shilem agirtem külemi tangokba noksa nung angur. WED amungba nungtem SARS-i sentong nung adener ajak nem tatemtsü süngdong tapu balala lema agütsü.



June 5, 2017 'World Environment Day' tenüng nung Mary Mead GMS School, Luyong nung tesayurtemi anir kaketshirtemi süngdong atemba sentong ka agiba sülen tangokba noksa angur.



Merangkong Baptist Arogo Children Ministry küm 50 ajungba jubileemung nung agiba noksa angur. Iba benjungmung ya June 3-4, 2017 (1967-2017) nung amung aser tongti o jembirji ABAM Child Co Ordinator, Mrs. Abenla Aier liasü ta Christian Education Director, Miss Anungla-i sangdong ka nung metetdaksü.

Malaysia nung Islamic Party-i anemba sülen Jerusalem sentong athir

Jakarta, June 5 (Agencies): Malaysia nung Khristan telok kati Jerusalem longjemshiba jubilee sentong ka agitsüba liasü saka Islamic party kati anema nokdakba ajanga sentongji athi.

Islamic party jagi sorkar dang sentong magidaktsütsü takhangba agütsü aser ibaji meinyakra, anema lungkak aitsü ta parnok amokmeren.

"Jerusalem indang Jubilee den külemi Nations of the Golden Gate sentongji Melaka yimti nung June 15 nungi 18 tashi agitsüba liasü. Iba ya 'Zionist Christianity' aser Yihuda nung sobaliba ajungkettsü atema lir" ta Pan-Malaysian Islamic Party (PAS)-i ashi.

"Israel-i tashiyim mapa inyakba ajanga Muslim nungertem timtemba onok temulung nung lir. Tang parnok Malaysia litsü nung Jerusalem indang jubilee amungtsü ayongzüker aser ibaji Muslim nung anema lir" ta PAS communication officer Nasrudin Hassan-i Facebook nung metetdaksü.

"Yihuda nung sobalibaji asen linük nung tera meyangdaksütsüla. Sorkari iba sentong anema mapa inyaktsüla. Muslim nung temulung meyrudaktsütsüla. Zionist Christian maparen ajanga Malay litsü menenmechi mesüdaktsütsü" ta paisa ashi.

Parnoki ayongzüba sentong anema police tsüngdang ken o 32 benokba agi sentong thiogo ta All Malaysian-Golden Gate Nation Revival Convocation-i metetdaksü.

Malaysia nung Khristantemji nütsüng yongsük nung shilem 10 shi lir aser parnok amangtsü atema telatetba kar lir. Zionism nung amendak Judaism aser Israel pusembaji Malaysia linük nung memelar.

"Malaysia nung Khristantemji taremsük, tangar atema bilemstür aser tangatertem dang lir aser onoki linük ka nung putepa aliba meraksatsütsü" ta Christ Church bishop Jason Selvaraj-i ashi.



June 3-4, 2017 tashi Changtongya Laishir Telongjem (CLT) Biennial Conference Changtongya Baptist Church (CBC) nung alidang agiba noksa angur. Iba sentong kanga dang takok ngua agiogo aser tongtipangsa bendang lima tesem balala nungi laishirtem medema aruba ajanga sentong ajak imlaba dang nungi tajungba agitet. Iba sentong takok asoshi Tsüngrem nem tenüngsang agütsür aser tarur ajak dang kanga pelar ta CLT Tir Rev. I. Wati Jamir, Pastor, CBC, ajanga sangdong ka nung metetdaksü.

OLONG PAITEP # 4442

1		2		3			4			5
							6			
		7			8					
9										10
			11							
								12		
			13			14				
15										
16										
			17							

TIPIEN

- 1. Züzüa / Rabalen - (8)
- 6. Endok - (4)
- 7. Tang / Iba mapang nung - (6)
- 9. Trok nungi adokba - (3)
- 11. Odang agütsü - (5)
- 12. Ayong nung tarok - (3)
- 13. Sentep anir - (6)
- 16. Achi-ajem masü / Yaset - (4)
- 17. Sensaker - (8)

LANGTSÜNGLEN

- 1. Yimsüsür tem - (6)
- 2. Waitsü - (5)
- 3. Shirang ajung - (4)
- 4. Temokong mapang - (6)
- 5. Shitak masü - (3)
- 8. Süngo tou sentüsü - (5)
- 10. Tsüngpret - (6)
- 11. Aria bilemba - (6)
- 12. Ana meta - (5)
- 14. Külemi / Lia - (4)
- 15. T _ _ _ msa - (3)

OLONG PAITEP # 4441 TELANGZÜBA

TIPIEN :

- 1. Asa, 3. Nüngja, 7. Kaket, 8. Tentet,
- 10. Teki, 11. Cien, 14. Nemjem,
- 15. Osang, 16. Samesa, 17. Ali.

LANGTSÜNGLEN :

- 2. Asenok, 3. Nüktabangta, 4. Nükj, 5.
- Jati, 6. Atita, 9. Anema, 11. Lijaba, 12.
- Tola.

Noksa nung meputepi aliba tesem 8 bushiang



TANÜBO NAI LANGZÜANG

Q. Ireland Ato kilonser atema shiba shima lir?

- [A] Leo Varadkar [B] Brian Cowen
- [C] Mary McAleese [D] Enda Kenny

(Taruba adok nung onoki langzüsü)

YASHI ADOK TELANGZÜBA : National Assessment and Accreditation Council (NAAC)

Tanur asoba anogo nung salem osang den noksa angati adokdaksünürä - Tenüng, Küm, School, Talidak & salem osang tejanga zülür, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimiyim. bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA

PUNGMANG... PUNGMANG... PUNGMANG...

* Nisung karibo pungmang dang atangji nung saaker jajar, aser ibaji 'REM sleep disorder' tapu ka lir.

* Nai pungmang nung züngtettsü makok.

* Nisung shilem 12 shii dang sentüsü tanak aser temesüng nung pungmanger

* Pungmang nung 'Sleep Paralysis' ajangshiba ya tapu ana lir- ka asen temang inyakyim ajanga temang marakzütetba aser ka atangji nung temenen mopungsem agi temang marakzütetba lir.

* Nisung karibo khenyongi pungmang mepungmanger ta jembir, ajisüaka ibaji shitak masü, kechiyong nisung ajaki pungmang pungmanger saka karibo pungmangji meshimeshia amadoker.

* Teburtemi pungmang nung pungmangba nisungtemji shilem 70 bo teburtem pungmanger, saka tetsürtem pungmang nungbo tetsür aser tebur kasa shi dang pungmanger.



SUDOKU # 3555

		1	3		2			
	7		8	2			9	
1	8				5	4		
				3	7	9		
4	7	2		9		3	5	
9		5			6			
	5					1	2	
3		1	9					
2	4					7	8	

TELANGZÜBA # 3554

7	4	3	5	8	1	9	6	2
6	1	2	3	9	7	4	8	5
8	9	5	6	4	2	3	1	7
9	3	6	7	2	5	1	4	8
1	7	8	4	3	9	2	5	6
2	5	4	1	6	8	7	9	3
4	6	1	2	5	3	8	7	9
3	8	7	9	1	6	5	2	4
5	2	9	8	7	4	6	3	1

OJANG LUTEP # 4050

- NTÜA : □□□□
- TUPU : □□□□
- NGBONU : □□□□□□
- NGAKA : □□□□□
- MELASKSAAA : □□□□□□□□□□
- TERMIALI : □□□□□□□□
- GAND : □□□□
- GONKAMA : □□□□□□□□
- IAAK : □□□□
- UATSNÜG : □□□□□□□□

OJANG LUTEP TELANGZÜBA # 4049

ASENOK TATSÜKA AKÜMLI WADANG BALALA NUNG TENZÜKDANG AKOK TASHI KÜMDANGTSÜLA

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



Aries 21/3-19/4

Nai aiben tangar mapa nung teka amuoka ia shilem agitsü bilemer südi. Saka tanü nai iba ama inyakra timtem ajurutsü.




Taurus 20/4-20/5

Na ajungtsü asoshi mapa inyakba mapang tangari meinprongba ajanga na tezü adangtsü. Aser tanü nai aji ajurutsü südi.



Gemini 21/5-20/6

Tanü nai tangar den sensaksemba mapang nü tejangrabatem melemsatsü tasak asütsü. Anungji tanü nai item tejangrabatem tangar den melemsateptsü meranang.



Cancer 21/6-22/7

Nai tanü nür medemer dang nü temeim sayutsü bilemtsü. Saka na asoshi tongtipangbaji nür kibong ta nai metettsü tim.



Leo 23/7-22/8

Tangari bilemba ajakji nai inyaksü tamakoktsü. Anungji tanü na tanishir ka süra tangari ashiba ajungabo mangashi tajungba asütsü.



Virgo 23/8-22/9

Tarutsü anogotem asoshi nai tangar dang nungi alakteta bilemer. Anungji tanü nai tangar dang yimya tajung sayutsü merangang.



Libra 23/9-22/10

Tanü nai mangatettep kar ajurutsü aser nai ochi shia inyaksü tasak asütsü südi. Saka na tiyongi ayitsü merangtsüla.



Scorpio 23/10-21/11

Tanü mapa tilateri kar nung na ain-apong adoktsü südi. Anungji nai iba yimya tangar dang mesayutsü merangang.




Sagittarius 22/11-21/12

Tanü nai tangar den jembishinü dang nü nükjidong meteta aser anepalua jembiang. Aser iba ajanga nai mapa tulu inyaktettsü.



Capricorn 22/12-19/1

Nai bilemba aser amangba nung tanü akang akanga nokdaktsü merangang. Saka na tangar den tesendaktep meraksatsü bilemang.



Aquarius 20/1-18/2

Tanü khuret kar ajanga nü taküm nung kongshitsü südi. Saka nai na atema bilema inyakra nü anogo tajung asütsü.



Pisces 19/2-20/3

Yimjung nung nü anogo süyidaktsütsü asoshi nai medemer kar yariang. Aser nai parnok taginüba tem metetra jangratemtsü asütsü.

Tom Cruise-i Top Gun 2 film title metetdaksü



Los Angeles, June 4 (Agencies): Actor Tom Cruise-i 1986 küm sayaba nungtugu film 'Top Gun' tatongtep film tawa Access Hollywood den sensaksemba mapang metetdaksüogo. Iba taruba film indang tenungji Top Gun: Maverick asütsü. Cruise-i ashiba agi, iba film taoba film den style bo

kasa shi dang asütsü aser score-a original composer, Harold Faltermeyer-i renema kasa shi dang asütsü, ta osang ka ajanga metetdaksü. "Iba film ya tetoktepba film ka asütsü aser onoki machine tulu aser tekara amshitsü," ta Cruise-i ashi. Film title sangdongba

mapang Cruise-i film nung shilem agitsüpurtem indang kecha mashi, "Iba indang asenoki mejembitettsü. Nenoki tereprang dang reprangang" ta pai ashi.

Cruise-i iba film yanglutsüba indang hopta ishika tajakdang Australian TV show ka nung metetdaksü.

1986 küm iba movie director Tony Scott aser Tom Cruise na 2012 küm ajurutepa Neveda nung 'Top Gun' movie tanabuba yanglutsü asoshi tesemtem reprangdanga liasü saka tena ajurutepba sülen ita tatemlen director ya suseta asü. Iba ajanga Top Gun tatongtep film yanglutsüba sentongtem khen atema anena ata.

Aji süaka taoba küm June ita iba film production company Skydance indang CEO David Ellison-i "Top Gun 2" film otsü nung Cruise indang character, Maverick temolung dang yur züludar ta sangdongba liasü.

London amakba indang Bollywood Celebrities-i lemsateper

Mumbai, June 04 (Agencies): Kiralongrartemi London yimti anaben tashi amakba osang angashia aoksar ta shia Shruti Haasan, Neha Dhupia, Anubhav Sinha aser Salim Merchant nung densema Bollywood celebrity aikati nüburtem dang longjema alitsü ayongzük. June 3 nü kiralongrartemi London amakdang nisung tenet tepset aser nisung 48 yiruja liasü. Taküm March ita nungi tenzüka tang tashi nung kiralongrartemi UK asemben tashi maakogo. Shruti Haasan-i twitter ajanga, "Tobur tajung London nung iba ya atalok ta ni mamangteter. Ni ajak atema

sarasademsür," ta ashi. Shekhar Kapur-i twitter ajanga, "Alima nung kiralongra anema tajungtiba agi meranga inyakaka UK maneni amaker, kiralongrartem nokdangtsü atema inyaksüla. Alima nung kiralongra mapa nung aartsü mali. Iba ya tashidak ka lir aser taneptsü nüngdaker. Iba ya parnok kija tebilemtsü ka masü#LondonBrige," ta ashi. Rahul Dholakia-ia twitter ajanga, "Joko iba ya 'breaking news' ka masü saka 'Heart Breaking News' ka kümogo. London atema sarasademjang#UnitedWeStand" ta ashi. Parineeti Chopra-i, "Alima aiben amakba ya mamangteter.

Tesünep atema sarasademer," ta ashi. Neha Dhupia-i, "Ano kiralongrartemi maakogo. Ano tai maket nisungtem asüba anogo ka.. ano saaker, alima nung kechi ataloker ta asüngdangba anogo ka," ta ashi. Salim Merchant-i, "Tang Paris tongogo, aser London amakba osang angashia aoksar. Iba ya kodang ang tembangtsü?. Raraba osettem yangluba industry-i iba ya atalokdaksür ta ni bilemer," ta ashi. Akshara Haasan-i, "Ano London nung kiralongra atalokogo. Iba ya tejashitsüka lir. Temelung malemtsüsa inyakba mapatem mita liang, aser kümzüka liang," ta ashi.



London nung Baywatch film ajungketba sentongtem nung shilem agiba sülen Priyanka Chopra-i New York nung Kate Mara, Kendall Jenner, Keri Russell aser Nicole Kidman nung den polo match ka asayatsü atema arudang agiba noksa angur.

TAN HOPTA ATEMA - KOMA SÜLA ?

Q Nagaland nung tzü mopong merükteta yunüba temaitsü ka sayua Deobar nü amangba purtem ajak tenla kidangi aodang gari mebeni tetsüng agi ao nunga koma süla?

Olong 20 shi nung June 09, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobar nü adoktsütsü.

Arishi kum 51 nung stunt balala aitsü ya temela masü: Salman

Mumbai, June 5 (Agencies): Salman Khan tang action film Tiger Zinda Hai nung shilem tagidak lir aser iba sülen Remo D'Souza indang dance movie ka nung shilem agitsü asoshi sentong lir, ajisiaka Salman-i ashiba agi, arishi kum 51 nung film nung stunt balala nung shilem agitsü ya pa atema temela masü.

Taoba mapang melangtepba film Sultan nung shilem agiba ajanga pa temang nung timtem agütsü, ta Salman-i ashi iba den pai asayamenü meyong süa Ali Abbas Zafar-i direct asüba spy-action movie nung shilem agitsü asoshi nangzükba ya tamashi mapa ka lir, ta ashi.

"Sultan film tangokba sülen kü temang nung ngoya ngoshi aika liasü aser tang tamachi ama 'Tiger Zinda Hai' nung shilem agitsü asoshi tenzüker. Film nung asemtsüba mesüra ki ka nungi

ki ka pongdangtsüba amala stunt balala aika nung shilem agi aser ni matu kumdar. Künübo kü temokok ya pokteta adoktsü amai ni bilemer. Iba film tangokzüker külen ni Remo D'Souza indang 'dancing film' ka nung shilem agitsüba lir. Mezüngbo ni iba film nung tsüngsangba shilem kar alitsü aser idakji shilem agitsü ta dang bilem saka tanü asüng tsüngsang nung 'acrobatics' aser 'gymnastics' amala lir ta ni yimdangi marui liasü," ta pai ashi.

Mapang tatsüka tejakdang iba film title ya ABCD 3 asütsü ta osang ka sangdonga liasü saka iba osang ya tai ta pai shiogo. "Ni ABCD 3 film nung shilem magir, ibaji Disney meyong. Dance film ajakbo ABCD masü," ta Salman-isa ashi.

Kabir Khan-i direct asüba

film Tubelight nunga Salman-i shilem agiba angutsü. Iba film ya tena külemi shilem agiba tasembuba film lir. Taoba mapang nung tena Ek Tha Tiger aser Bajrangi Bhaijaan nung külemi shilem agia liasü.

"Kabir den film asem nung külemi inyakba sülen küna kanga junga angateteper. Küna kanga ayonga inyaker, saka pai kü nem shilem agidaktsüba film ajak nung shilem agitsü ta mali. Pai kü nem shilem agidaktsünüba film kar ni temolung mesera ni meinyaktsü, kasaji pai shilem ka ni asoshi mapet ta bilemra kü nem iba shilem magütsütsü," ta paisa maneni shisem.

Iba film nung Sohail Khan, Om Puri aser Chinese actress Zhu Zhu nungeri tongti shilem agir aser Tubelight film ya June 23 nü sayatsü. Film nung maneni Katrina Kaif-i tongti shilem agitsü.

Moto Z2 Play June 8 nü sayatsü



June 5, 2017 (Agencies): Lenovo meyong Moto-i second generation Moto Z Play handset India nung Brehostibarnü sayatsü asoshi renema lir. Moto Z2 Play ya tawa dollar \$499 yong sayaa liasü koba India sen agi meyipra 32,200 shi adoktsü. Taoba Moto Z Play ama iba phone ajanga Moto Mod support asütsü.

Moto Z Play tejenba jenjang sen 24,999 liasü aser tawa OnePlus 5, Xiaomi Mi 6 aser Nokia 6 phone tem sayatsü aliba mapang Lenovo-i iba phone tasenba ya item phone tem den toktepba jenjang koda medemdanga adoktsü, ta aikati yongya atar.

Moto Z Play tejenba nung tesülen glass keta aliba ama masü saka Moto Z2 Play tasenba nung 'sleek metal unibody design' keta angutsü. Moto Z2 Play nung 2.2GHz octa-core Qualcomm Snapdragon 626 processor keta lir aser iba phone nung RAM aser storage option anana angutsü: 3GB/32GB aser 4GB/

64GB, ta alitsü. Z2 Play nung SIM card slot ana aser 256GB microSD card slot balaka ta keta alitsü imlar. Phone nung Corning Gorilla Glass dena 5.5-inch Full HD display keta lir aser gram 150 dang nungi tajemba lir. Iba phone ya 'splash resistant' lir saka 'water proof' bo masü.

Maneni Moto Z2 Play nung operating system ji Android 7.1.1 Nougat alitsü aser iba den külemi dual-tone Flash densen tesülen camera 12MP f/1.7 PDAF aser flash dena selfie camera 5MP f/2.0 keta lir. Phone nung tanga feature tem rong ano fingerprint scanner dena lir aser battery tashiji 3,000 mAh lir.

Moto Z2 Play tasenba ya June 8 nü nungi mekaa yutettsü. Iba phone jalia makaa yunertemi sen 2000 jilia agütsütsü nüngdaker aser tanungba sen ita 10 tsüngda nung kecha tetemlok makai aotettsü. Maneni Moto Z2 Play nung Armor pack keta yanglua lir koba nung phone kümzüka ayutsü asoshi 'accessories' tem keta lir.

Samsung Galaxy S8 'Pirates of the Caribbean' edition sayaogo



June 05, 2017 (Agencies): Disney den külemi Samsung ajanga 'Pirates of the Caribbean' them nung Galaxy

S8 sayaogo. Iba smartphone ya 'Pirates of the Caribbean: Dead men tell no tale' nüngtem nung yangluba lir.

'Comic character' amshia Samsung ajanga phone aika sayar. Taoba mapanga Batman nungtem nung Galaxy S7 Edge phone iba company ajanga sayaa liasü.

Pirates of the Caribbean indang Galaxy S8 phone nung ya hon sentsü nung nisung tekolakret (pirate logo) keta lir, phone shibangba cover ka, ring holder ka aser iba movie indang

noksa aketba 'themes' aser ola tem keta lir.

Iba 'Special Edition Galaxy S8' phone nung ya tanga Galaxy S8 phone nung aliba ama display 5.8-inch QuadHD, 4GB RAM, 64GB internal storage aser 3,000mAh battery tashi keta lir. Iba smartphone nung Android Nougat 7.1 inoka lir.

Pirates of the Caribbean indang Samsung Galaxy S8 ya China nunger indang e-commerce website, JD.com nung sen 56,623 agi angutsü.

Apple CEO-i US, Paris Climate Deal nungi atsünginba dak sendakba nung employee dangi shidi zülu

June 5, 2017 (Agencies): Apple CEO Tim Cook-i Apple nung mapa inyakertem dangi shidi ka ajanga Paris Climate agreement nung shilem magitsü asoshi White House-i telemtetba agiba atema tezü danga bilemba lemsatop. "Climate ya atangji nung melenshidar aser iba ya raratsü asoshi asenok ajak khuret lir," ta Cook-i zülutsü.

Tawa United States tir

Donald Trump-i Paris Climate Accord nung senotsü tsütsü parnok nem khuret tali agütsüba ajanga iba nung madentsü asoshi telemtetba agiba sangdonga liasü.

Cook-i maneni ashiba agi, Trump telemtetba agi Apple company-i tzü mopung kümzüka ayutsü asoshi merangba maparen dak mekongshitsü. Apple-i tarutsü nung e-waste nokdangtsü asoshi material tasen

mining asüba anentsü atema nükjidong lir.

Trump-isa ashiba agi, Paris Agreement nung US ano tanaben adentsü asoshi jembishinü tenzütsü. Ajisiaka Trump-i global warming aitsüba aser Climate Change ya kar ajangzüktsü asoshi ashikelak maparen ka lir ta ashiba, Mayor 61 shi-i aitsüogo, ta osang ka ajanga metetdaktsü.



Dimapur, June 5 (Agencies): Parliamentary Secretary, Economics & Statistics, Tovihoto Ayemi-i Holy Cross point anasa mobile showroom; ACER POINT CHANNEL 2, Hombarnü lapoktsü dang tangokba noksa nung angur. Pai iba sentong nung ano Nokia 3310 mobile sayaa liasü.

Kerala nung World Environment Day tenüng nung süngtong crore ka atem

Thiruvananthapuram, June 05 (Agencies): Hombarnü alima ajunga nung World Environment Day amongba den külemi Kerala nunga mongogo, aser iba sentong nung state sorkari anir süngtong tila crore ka lemshia state tesem balala nung temdaktsü.

World Environment Day osang sangdongba nung Kerala Chief Minister, Pinarayi Vijayan-i nüburtem aser lokti ajunga dang sorkari süngtong atemtsü sentong yangluba nung yaritsü ajungshi.

Forest Department-i süngtong tila lakh 72, Agriculture Department-i parnok indang nursery tem nungi süngtong tila lakh 5 agütsü. Tanüngba süngtong tila lakh 23 ya Kudumbashree densema agency balala nungi agütsü, ta sorkar osang ka ajanga ashi.

Iba sentong nung sorkari mozü aliba aser süngjanglijang adangba süngtong tem timba agütsü. Acacia aser eucalyptus



süngtongtem ajanga ali telung nung aliba tzü kanga ajemba ajanga iba süngtong matemtsü sorkari lemtet.

Iba sentong nung Kerala Angh, P Sathasivam-i Raj Bhavan nung shilem agia süngtong atem aser Malayalam actor, Mohanlal-ia college nung oa süngtong atemba sentong nung shilem agi.

Kerala ya tourist temi kanga sabuba state ka lir aser iba state nung ya tetsür tebur bendanga mamshir aser tzü mopung den apat mapatem kanga bolua inyaker.



June 05, 2017 nü New Delhi nungi Video conferencing ajanga Ato kilonser, Narendra Modi-i 5buba SPIC MACAY Internatinal senden nung jembiba noksa nung angur.

GST ajanga India rongsenketstung nung temelenshi alitsü: Modi

New Delhi, June 05 (Agencies): Hombar nü Ato kilonser, Narendra Modi-i, saru inyakyim tasenba, GST July 1, 2017 nü nungi tenzüka inyakba ajanga India nunger rongsenketstung nung temelenshi adoktsü, ta metetdaksü.

Ato kilonser, Modi-isa yimtenren party tem, shishilembaba tenettem aser Industry tentettem densema stakeholckers ajaki amalitepa inyakba ajanga GST mapa küma inyaktsüsa jenjang nguogo, ta ashi. Pai ketdangsertem dang, Linük ka; Market ka aser Saru ka akümba ajanga sensakertemi kanga tajangzük angutsü, ta ashi.

Ato kilonserisa GST dak

sendakba cyber-security nung kanga nendaka inyaktsü tetuyuba agütsü.

Tanü Modi-i GST inyakyim reprangshia liasü. GST ya taruba ita nungi mapa küma tenzüksü.

Tanü iba senden nung Union Finance Minister, Arun Jaitley, Revenue Secretary Hasmukh Adhia aser Central Board of Excise & Customs (CBEC) nungi tongti ketdangsertema dena liasü.

GST Council-i osettsüset aser chiyungtsütem nung rates latetba sülen tang mezüing Modi-i GST inyakyim reprangshio.

Finance Minister Arun Jaitley leniba nung state tem nungi Finance Minister temi tentetba GST Council-i goods aser service ajak nung saru

shilem latetogo.

Ano maneni parnok June 11 nü senden mena tanüingba onük kar nung o lemteptsü.

Goods aser service balala nung saru shilem 5, 12, 18 aser 28 latetogo. Ano hon aser senti insang/merangtem nungbo GST saru shilem 3 dang asütsü aser rough diamond nungbo saru shilem 0.25 dang asütsü.

Shini, mamatzü, mochitzü, antzü, curd, unpacked foodgrain & paneer, aonsotsü, unbranded atta, maida, besan, ninang mochitzü, shisaliok aser health services nungbo GST saru malitsü.

GST ajanga GDP shilem 1-2 shi aintsü aser osettsüset nung jenjang shilem 2 shi ajema alutsü imlar.

Kashmir onük ya Pak aser India nati dang latettsüla: Sushma

New Delhi, June 05 (Agencies): Ato kilonser, Narendra Modi-i aniba NDA sorkar küm asem ajungba nüngtem nung New Delhi nung ayongzükba osangbenertem senden ka nung jembidang External Affairs Minister, Sushma Swaraj-i, Pakistan-i Kashmir onük ya International Court of Justice (ICJ) nung benoktsü makok, iba onük ya linük anati dang bentettsüla, ta ashi.

India-i Pakistan den mangatetep onük ajakji ken o

jembiba ajanga bentetner, ajisüaka kiralongra aser ken o jembiba na külemi aotsü makok, ta laisa ashi.

Pakistan den inyakyimba maparen nung sorkar tashimait kecha mali, ta lai ashi.

Astana nung SCO senden alidang Ato kilonser, Modi aser Pakistan Ato kilonser, Nawaz Sharif na ajurua senden amentsü, ta osang prokba dak sendakba nung lai, "Tang tashi nungbo linük anapronglai iba atemaji jembiba mali," ta ashi.

Paris climate tezüngüktep dak sendakba nung lai, "India-i senotsü nung merumeruba ajanga Paris agreement agi masü. Onoki alima kümzüka ayutsü atema inyaktsü aser iba atema India-i küm 5,000 tashi inyaka arudar," ta ashi.

India aser US tesendaktep dak sendakba nung Union Minister-i, Donald Trump US Tir akümba sülen nungi India-US tesendaktep indar; Barack Obama Tir inyakdang linük ana tesendaktep ainba kasa jenjang nung indar, ta ashi.

Paris accord ajanga India den US tesendaktep meraksatsü: US

Kolkata, June 05 (Agencies): US Tir, Donald Trump-i Paris climate tezüngüktep nungi pilaba ajanga US-India tesendaktep meraksatsü, kechiyong linük anati tejakleni aotsü atema lenmangtem bushitsü, ta tanü Kolkata nung US nungi ketdangser kati ashi.

West Bengal yimtiba nung osangbener den jembidang US Consul General Craig L. Hall-i, "Tangbo US-India tesendaktep kanga ulua tarokba kümdar. Medemer rongnunga mangatetep adoker, anungji ibaji taoktsatsü osang ka masü. Onoki tangatetba balala atema inyaktsü aser tejakleni aotsü. US-India tesendaktep nung ibaji tangatetba tajung ka lir," ta ashi.

Brihostibarnü US Tir, Donald Trump-i US linüki climate Change indang Paris agreement nungi pilaba osang sangdonga liasü.

Iba onük nungsa US Tir, Trump-i India aser China nata anema jembiba liasü.

US telemtetba ajanga India-US tesendaktep kongshitsü asü? ta asüngdangba langzüdang Hall-i, "Yamaji masütsü ta ni bilemer. Iba (US-India) ya tesendaktep tulu ka lir aser tang onok tangatetba balala süaka, maneni amalitepa alir aser maneni jembidar," ta ashi.

"Onük aika nung onok (India-US) tangatetba kasa lir, anungji onük ka nung tangatetba balala asüabajibo kecha masü. Onok kibong ka ama aser medemer ama lir. Iba atemaji onoki inyaktsü. Onoki iba onük atema jembitsü aser maneni tejakleni aotsü," ta ashi.

Alima tzi-mopung melenshiba nokdangtsü atema linük aikati longjemer carbon emissions nokdangtsü atema tezüngüktep agiogo, ajisüaka US-ibo iba tezüngüktep nungi pilaogo.

ISRO-i GSAT-19 Satellite den rocket takok ngua khakettsü



June 05, 2017 nikongdang Sriharikota, Andhra Pradesh nung aliba Satish Dhawan Space Centre nungi GSLV Mk III rocket takok ngua khakettsüba noksa nung angur.

New Delhi, June 05 (Agencies): Hombar nikongdang 5:28 ako nung Indian Space Research Organisation (ISRO)-i Sriharikota nung aliba Satish Dhawan Space Center nungi GSLV-Mark III rocket takok ngua geo synchronous orbit nung khakettsüogo.

Iba rocket nung touzük seret 3,136 GSAT-19 communication satellite lir, aser ibaji alima nungi kilometer 36,000 pilar anentsü.

Iba rocket ya sen crore 300 shi intoka yanglu aser küm 15 shia agia yangluogo.

Scientist temi "Monster Rocket" ta ajaba rocket yagi seret 4,000 indang satellites bentettsü.

India-i seret 2,300 dak tema communication satellites khakettsütsü atema tanga linüktem nungi teyari agia liasü, ajisüaka tang iba rocket

khakettsüba sülenbo India-a satellite kanga taret khakettsütetba linüktem (elite club) rongnung adentsü.

Tang tashi nungbo United States, Russia, Europe, China aser Japan linüktem ang satellite taret khakettsütetba elite club nung lir.

Iba rocket ya indigenous cryogenic engine ka ajanga tashi agütsür, aser iba nungji liquid oxygen aser liquid hydrogen amshir.

Tang iba rocket khakettsüba ajanga India-i anüngtawa (space)-i nisung yoktsü merangba maparen nung jenjang ka alangzükettsü imlar.

Osang angazükba agi, space-i nisung yoktsü atema inyakba mission atema ISRO-i Centre dang nungi sen crore 12,500 meshir, aser ibaji sorkari agizükra iba mission atema küm tenet shi agitsü.



Tonk, Rajasthan, June 04, 2017: Deobarnü Rajasthan kübok Tonk nung Minister of State for Information & Broadcasting, Col. Rajyavardhan Singh Rathore-i Pradhan Mantri Ujjwala Yojna (PMUY) kübok angati LPG connections angurtem külemi tangokba noksa nung angur.



Sydney, Australia, June 5, 2017: Australia yimtiba, Sydney nung aliba Government House nung 2017 Australia-United States Ministerial Consultations (AUSMIN) senden nung New South Wales Governor, David Hurley (tiyong), (abelen nungi ajichilen)- U.S. Secretary of Defence Jim Mattis, Australia Defence Minister, Marise Payne, Australia Foreign Affairs Minister, Julie Bishop aser U.S. Secretary of State, Rex Tillerson nunger külemi tangokba noksa nung angur.

US nung senzusemponger nokdangba ozüing tesashiba akümstsü

Washington, June 05 (Agencies): Taoba mapang linük eshika nungi US-i aittsü nokdangba temzüing yanglua aliba anu meneni US tir, Donald Trump-i iba ozüing tesashiba kümdaktsütsü shiogo.

US tir-i tanep Twitter nung sangdongba agi, United States lendong timtem nungi kümzüksü mechi senzusemponger aruba tem kanga junga mita repranger, ta zülutsü.

"Supreme Court nem political tsütsü nungi shidak ta bilemer agütsüba ya masü saka Travel Ban chichiba nung aliba ama Justice Department-i inyaktsüla asü," ta Trump-i zülutsü.

"Linük kümzüka ayutsü mechi sentong ajak nung nisungtem US-i aruba kanga kümdanga mita repranger. Court aser yimden yimsüsüba ya tenüshi lir!" ta US tir-i pa indang Twitter nung zülutsü.

Trump administration-i court dang jungjunga shisadangtsü asoshi 'petition' zülua aliba nem American Civil Liberties Union-i June 12 tashi nung telangzüba agütsütsü asoshi Supreme Court-i Hokulbarnü totuyuba agütsü.

Iba telangzüba agütsüba sülen ang iba ken o agütsü magütsü telemtetba high court-i agütsütsü.

Muslim kin timba aliba linük trok nungi senzusemponger US linüki maitdaktsütsü asoshi taoba mapang Trump administration-i tenokdangba agüja aliba tanaben inyaktsü asoshi court dang asüingdang anogo ka süiba sülen iba totuyuba ya agütsü.

Executive order amshia Trump-i January nung linük tenet nungi nüburtem US-i anogo 90 tashi maittsü aser linük nung refugee sentongtem anogo 120 atema anena atatsü asoshi

tenokdangba agütsü, saka iba totuyuba ya court ajanga nokdang.

Senzusemponger nokdangtsü ya nüngdaker aser iba sentong ya reprangshia ozüing tasen ka yanglushitsüla, ta US sorkar ketdangsertemi ashi.

Federal judge temi ashiba nung lirumedema kümdaktsütsü nükjitong nung iba 'executive order' ya March ita tera melenshi. Iba mapang US-i Iraq nüburtem aittsü nokdanga aliba agien aser Syria refugee tem kodanga US-i maittsü tenokdangba agüja aliba agien.

Iba totuyuba ya nisung temeden asoshi nokdaker aser US nung Democrats densema nisung aikati aitsü.

"Nüburtem, obendanger aser court ajanga parnoki molungba jembitsü, saka asenoki kechi nüngdaker, aji ni ashir, TRAVEL BAN!" ta Trump-isa ashi.

Saudi Arabia-i Qatar Airways indang tayimtsü kata meyoki anenja lir

Doha, June 05 (Agencies): Saudi Arabia-i Hombarnü 1159 GMT ako tashi Qatar Airways indang tayimtsü kata meyoktsü, ta osang ka sangdongogo.

Aser iba tenokdangba agütsüba mapang ya atsülangtsü asü masüar anu tejangja memetet, ta Qatar Airways indang odongtar-i ashi.

Saudi Arabia den tesendaktep aliba akangshitsü

asoshi US tir, Donald Trump iba linük semdang ita ka sülen Hombarnü, Gulf state temi Qatar den tesendaktep aliba raksa aser mitkar telongjem nungi Qatar ya meindok.

Qatar indang kidanger linüktem rongnung Saudi Arabia, Bahrain, United Arab Emirates aser Egypt linüktemi Qatar den tesendaktep salar, ta sangdonga lir.

Kiralongrar aser tashiyim

mapa inyakba nungi kümzüksü mechi Qatar den tesendaktep malitsü aser ali, tzü aser tayimtsü tesendaktep ajunga shibangtsü, ta Saudi ketdang-i osang sangdonga lir.

Middle-east nung US mitkar indang tayimtsütem anenba tesem tulutiba ya Qatar nung lir aser iba ajanga Islamic State telok, jihadists anema raratsü asoshi tongtipang tesem ka akümer.



VALLETTA, JUNE 5, 2017: Malta Labour Party lenir, Joseph Muscat-i Hombarnü Vallete nung Malta Ato Kilonser menden atema tezüngzüktep agiba sülen pa den kinungtsü, Michelle-na pa office, Auberge de Castille-i aruba noksa nung angur.

LONGKONG KAKETSHIR TELONGJEM KOHIMA TENÜNGSANG AGÜTSÜR

Kr. Imlisenla Imsong, Wb. Marsoba Imsong aser Wt. Lanusangla-na jala-i Bachelor Of Church Music renemba aser Best Performing Award (Voice) Singapore Bible College, Singapore nungi takok tulu agüba yong, Longkong Kaketshir Telongjem Kohima ajanga la dang kanga pelar aser tetushi tulu agütsür.



Iba denji, Sp. Jungshinungsang Imsong, Wb. I. Sowa Imsong aser Wt. P.Moaienla Lemtur jabaso-i Bachelor of Engineering (Civil) Assam Down Town University, Assam nungi takok ngua renemba aser kaketshir kwikati H.S.L.C. aser H.S.S.L.C. Examination, 2017 nung takok tulu ngutetgo, ajak dang kanga pelaba metetdaktsür.

Sd/-
Tsongporong Imsong
Tir, LKTK

Sd/-
Akumsashi Ao
Tongti Zülur, LKTK

OFFICE OF THE UNGMA SENSO MUNG DANG UNGMA, MOKOKCHUNG, NAGALAND. TENÜNGSANG AGÜTSÜR

Ungma Senso Mungdang-i asen senso Wb. Imlimeren Jamir S/o Mr & Mrs. L Sosang Jamir, Additional Commissioner (IRS) jenjang tonggetba atema mungdangi nü nem tenüngsang tetushi tulu agütsür.

Tsüngremi asen lenir maneni moajang.
Sd/-
TAKOYANGER TATAR
PRESIDENT
Ungma Senso Mongdang

Sd/-
DR. RONGSENSUSANG
GENERAL SECRETARY
Ungma Senso Mongdang

London amaker rongnung Pakistan nunger ka dena liasü



LONDON, JUNE 5 : Honibar aonung London Bridge nung kiralongrar temi lendong agütsüba tesem nüburtemi semdangba mapang tangokba noksa nung angur.

London, June 05 (Agencies): Taoba Honibar aonung kiralongrar aseme gari ka hire sür London Bridge nung tetsüing agi jajarterm dak atsükba sülen Borough Market nunga nisung dak atsük, iba sülen parnoki nisung aika dak kotari agi tsünga liasü, aser par asem rongnung kabo Pakistan nungi Jihadist züingsem ka liasü.

Iba amakba nung nisung tenet asü aser nisung 48 mozükidangi anir ao.

Metropolitan Police-i ashiba agi, nisung ka tenüing agi Abz bo Pakistan nungi "jihadi" züingsem ka liasü.

Osang ajanga ashiba agi, arishi küm 27 tain, Abz ya tamalen London Tube worker ka liasü aser Channel 4 TV documentary "The Jihadis Next Door" nunga shilem agiogo.

Honibarnü London Bridge aser Borough Market amaker rongnung tongtiji pa liasü, ta police-i jangjaogo.

Iba mapang nungji Abz-i Arsenal strip tola ka semer liasü, ta kasa osang ajanga ashi.

Abz maittsüji taoba mapang par medemer kati jangjatsü. Iba nisungba jagi police dang Abz indang nija osangtem metetdaktsü.

Tanur ana tebu, Abz-i YouTube video tem reprangba ajanga kiralongratsü atema pa ajungmesoa liasü, ta iba nisungba jagi police dang ashi.

Pai-sa ashiba agi, Abz-i America nunger sempaba indang sayutsüingir, Ahmad Musa Jibril indang video tem YouTube nung repranga liasü.

Ano Abz'er kiyonger ka tenüing agi, Erica Gasparri-i, "Pai ozü tanurtem kiralongratsü atema ajungshi, pai Park nung tanurtem dang Islam yimsü indang ashi. Ano Ramadan mapang nung pa kidangi arua tanurtem nem sen aser nanglongsa agütsü," ta ashi.

Lai-sa ashiba agi, "Pai kü dang, 'Allah tenüing nungbo pai ajak inyaktsü, aser kütsü-a tepsettsü melunga lir' ta ashi."

Honibar aonung tatalokba dak sendakba nung police-i nisung 8 pua lir.

Meimchir merumeruba...

(TAPAK 1 NUNGI..)

Tsüngremi meimchir nem alima nung taküm, rongsentem ketdang asütsü nungloksü, iba mapa ya alima nung shiruru, ozüsangnu, taküm aliba ajak, süngdonglidong dena süngjema litettsüsa ketdangsütsü khuret agütsübaji lir. aji saka, iba khuretji meimchiri tim mesüi tashiyim agi amshiba ajanga takütem aser süngdonglidongtem aika samadaksüogo, ta paisa takoksa ajuruba kar ashi.

"Meimchir meruru aser tangatetba nung anünga aliba ajanga alima tzümpung kanga raksaa kumdaksüogo. Tanü asen aliba lima kümzüka ayutsü asoshi kija aser lokti ajungai libaliru nung temelenshi lia tangatetba nung melenshiba ajanga dang alima rangben kümzüka yutettsü", ta paisa tayongzükba ka agütsü.

Tanü iba sentong nung Parl. Secy Amenba Yaden, Imkonglemba IAS, Prof. Sangyu Yaden, Prof. Lanunungsang Imchen parnokia alima tzümpung dak sentakba nung onük balala jembidang teinyaktsü tetuyuba aika agütsü. Iba sentong ya Department of Environment, Forest and Climate Change, Nagaland ajanga "Connecting People to nature" omen nung ajemdaker ayongzük.

Tanü Mokochung nung WED amundang bangzüng kar teloki renema ayu. Bangzüngtemji yamai:

1. Arem min aser yangji aliba libajen, libüküm aser taküm sangnu ajak wazüka ayutsü.
2. Yimtsüng shia alushi ka shimteter aremwa kümeta yangji aliba kechisarena kümzüka ayutsü.
3. Ozü litsü arem rongdokba nokdangtsü.
4. Ozü litsü nung aliba ayongtem wazüka ayutsü. Miim mozü, battery aser tanga inyaksangshi ajanga tzü nung aliba taküm shirurutem tepsetba nokdangtsü.
5. Arem shiruru aser ozüsangnu kümzüka ayutsü. ibaji nokdangtsü asoshi air gun nungi tenzüker perangpong mesüra ibala mesükba kecha mamshitsü.
6. Shishilembaba tesem aser lenmang tezülen arem shiruru aser ozüsangnu pua mesüra tepseter mayoktsü.
7. Lirem rongsen aser lung atepba mapatem (mining & stone quarries) kobasa putipuin shisa terajem makai (unscientific) - lenmang, ayong aser ayongnu tesem nung meter noklang ka (100) telungtet nung inyakba ajak nokdangtsü.
8. Yimtsüng telungtet, lenmang tepiyong, tekong lu tawa aser koba ali nung arem mekümi ali, ajak nung süngdong tsünüa atemtsü ajungshitsü.
9. Iba maparen tanen makai takok ngua inyaka otettsü aser libajen wazüka yutettsü merangba alizüng ajangzükttetsü atema arok mangdang ka ta angateta sorkar ketdangsüba aser bangdak den amalitepa inyakttsü.

BILEMTETER

Asür Mr. Noksangmeren sür küm 3 ajungba Anogo 6 June 2014



Temeim oba, na sür tanü küm 3 ajungba anogo onoki na menungra bilemteter aser kodanga amadoktsü makokba nü ola, temeim onok molungjang nung teti lir.

Temeim Kinungtsü, Chirnur aser Semchirtem.

**GOVERNMENT OF NAGALAND
DIRECTORATE OF SOCIAL WELFARE
NAGALAND : : KOHIMA**

Under the Govt. of India, Ministry of Social Justice & Empowerment, Department of Empowerment for Persons with Disabilities, a Central Sector Scheme of **"Establishment of College for Deaf in each of the Five Regions of the Country"** has been earmarked during the XII Plan period.

Details of the scheme are available at www.disabilityaffairs.gov.in.

Interested NGO's affiliated to the UGC approved Universities may apply as per the guideline through proper channel at the earliest.

**Sd/-
(T. MERANGTSUNGBA AIER)
Director**

Office of the

**Longsa Züngalepzük
TEPELA LEMSATEPER**

Aoli tzükong troksangeri temulung lemteta Ao Senden Tir asütsü asür lmtimeren jabaso Wb. Imliyanger Jamir nem yimli tulu agütsü nung, Longsa Züngalepzük ajanga tepela aser tenüngsang lemsateper.

Pa lenisüba kübok asen Aor takok aser temoatsü manung aotsü, Tsüngremi shisatsü aser arishi moajang ta sarasademtsür.

Sd/- Imsütoshi President **Sd/- Lanusüngküm Secretary**

TENÜNGSANG AGÜTSÜR

Mr & Mrs Masatoba Longkumer jala Miss. Sentirenla M Longkumer-i 2016 küm Cotton College State University Guwahati nungi M.Sc Statistics nung Gold Medal sempet tajung anguba takok asoshi Longkong Takolemba Aso-i la nem tenüngsang tulu agütsür. Ano, maneni tarutsü nunga nü mapatem nung takok ngudakjang ta sarasademtsür.

Sd/- Takolemba Aso Longkong President **Sd/- Takolemba Aso Longkong Secretary**

WANTED

Kitchen Helper Guest House in Shillong | **Salary - Rs. 5000/- Fooding & Lodging Free**
Ao Female - Above 20 years | **Contact : 9436439721 7005017981**

Office of the

**ONGPANGKONG WATSÜ MUNG DANG
KUKUA AITSÜR**

Chuchuyimpang nunger Asür Wb. Sujongkaba'r jabaso Wb. Lolenwati-i pa kinungtsü Wt. Moarenla (Chungtia) June 02, 2017 anepdang meimchir dak mapetba taochi makai tepsetba osang angashia Ongpangkong Watsü Mungdangi kukua aitsür aser asür tsürabur den asükhu lemsateper.

Anungji, iba mapa nung ochi obendang aser tapet temerenshi tekaratiba nung agütsütsü akhanger.

Sd/- (Wt. TALICHULA) President **Sd/- (Wt. NUNGSANGTULA) Secretary**

Tepela Lemsateper



ASO : 23/06/1945

ASÜ : 27/05/2017

Onoki teti meima aliba asür **Helen Jamir** (Changki), shiranga aliba mapang nungi tasünü tashi kija, kibong, arogo, doctors & nurses (IMDH) aser lokti balala shirnokisa nübu, rongsen, shisatsü den sarasadem agi onok nungita yariogo, nenok ajak dangi tsüngdong arua tepela meshitet nung, iba sabang ajanga ajak den tepela lemsateper. Tsüngremi nenok mapa tajung asoshi moajangma.

- Temeim kinungbo, chirnur, semshir & kinungertem.

Molungnen O

**Aso : 10th Jan. 1930
Asü : 27th May 2017**



Ojala Asür **Kenatemia Longkumer** (Chungtia) temang manemi shiranga aliba mapang nungi tenzüker akümüli wadang tembangba anogo 27th May 2017 tashi nung yimer yimsanger, kiyong kinar, purmedemtor, ana aser talang ajak nungi ozü terongjen mangyim mapang nung nenok senti nübu, rongsen, shisatsü aser sarasadem agi ozü mangyim jashi sünepja mulung süngzüktsüogo nenok ajak dang kanga pelar. Nenok mapa tajung teti onok den alitsü. Takarsang Tsüngremi nenok mapa tajung meyipa moajang ta ozü sarasadem.

-Temeim Kinungpu, Chirnur, Semchirtem aser Kinungertem

PELABA METETDAKTSÜR

27th Naga Students' Federation lokti mungdang Tzürang nung May 30-June 2, 2017 tashi alidang, kija kibong aser lokti shirnokisa mulungso tenla tajung agütsüogo, nenok ajak dang Medemyim Students' Union-i kanga pelaba metetdaksür. Tsüngremi nenok mapa tajung asoshi maneni moajangma.

DONORS LIST **AMOUNT**

- | | |
|----------------------------------|---------|
| 1. TEMJEN TOY | - 25000 |
| 2. T.N MANEN | - 10000 |
| 3. DR KIKA | - 10000 |
| 4. S.I JAMIR | - 10000 |
| 5. BDO TZURANGKONG | - 10000 |
| 6. TEMJEN IMNAALONG | - 10000 |
| 7. MR & MRS ASANG | - 10000 |
| 8. IMKONG KHAR | - 10000 |
| 9. ER MENANG(Rtd) | - 5000 |
| 10. MR & MRS MEYU | - 5000 |
| 11. MR & MRS BENDANG WALLING | - 5000 |
| 12. DR MEDEM MS,MKG | - 5000 |
| 13. MR & MRS BENDANG,JE | - 5000 |
| 14. MR & MRS MEYA | - 5000 |
| 15. MR SASHI | - 5000 |
| 16. MRS SUPONGLA | - 4000 |
| 17. MR & MRS BENDANGMONGBA | - 2000 |
| 18. MR & MRS LANUSUNEP | - 2000 |
| 19. MR & MRS TAJEN IMCHEN | - 2000 |
| 20. MR & MRS TALINUKSUNG | - 2000 |
| 21. MR & MRS WATISANGBA | - 1500 |
| 22. MR & MRS BENDANG | - 1000 |
| 23. MR & MRS MANEN | - 1000 |
| 24. MR & MRS YANGER | - 1000 |
| 25. MS ALEMLA | - 1000 |
| 26. MR & MRS TIA | - 1000 |
| 27. MR & MRS MOALIBA | - 1000 |
| 28. MR & MRS IMTSUK | - 1000 |
| 29. MR & MRS PONGENLIBA | - 1000 |
| 30. MEDEMYIM SENSO TELONGJEM,DMR | - 2000 |

Sd/- SASHI IMCHEN President Medemyim Students' Union **Sd/- ATULALKR General Secretary Medemyim Students' Union**

SUMO SERVICE

Dimapur to Molung
Departure : 6:30 am
(From Dimapur)
Contact: 9436067981

KABA CARE Ministry-i lipoküm wazüktsü Kohima Marathon ayongzük



Kohima, June 5 2017 (TYO) : KABA CARE-i ayongzuka tanü Alima inti Lipoküm Anogo nung lanurtem aika Kohima marathon nung shilem agia asen lipoküm wazuka ayutsü asentenshia ayongzük

Kohima Ao Baptist Arogo indang CARE ('Creating Awareness for Restoration of Environment') Ministry-i achayanga iba Kohima marathon agiba ajanga nüburtem rongnung Kohima merükmerük ayutsüba tayongzükba agütsü.

Iba marathon ya "lipoküm

den Tsüngremer meimchir tali sendaktepba akumba"nung ajemdaker ayongzük; aser PHQ junction nungi tenzükba civil secretarit junction nung tembang. KABA fellowship 7 nungi Lanur 70 dak tema aser tanga arogotem nungi kar ta densema iba marathon ya takok ngua asemtepogo.

KABA Pastor Tiatoshi longkumer ajanga okila shia iba marathon lapoktsü. Iba marathon ajanga Kohima yimtiba nung alir nem Kohima merüka ayutsü tayongzükba agütsüner ta paisa shisem. Lipoküm aser tasemteper

atema KABA Youth Evangelist Bendangsunep Imsong den sarasadem.

Iba KABA CARE Ministry ya 2015 küm tenzük aser nübur ajak arok ser shilem agiba ajanga asen lipoküm wazuka ayutsü aser talisa Kohima merüka ayutsü atema lir.

Town Fellowship nungi Temjenyanger Imsong aser Ministers Hill fellowship nungi Lanumongla Jamir, tenati tebor aser tetsür tem rongnungi mezüngbuba jenjang ngua liasu.

Tasemteper ajak nem Khuli kaket tajung den senpet agüja tembang.

French Open 2017: Murray aser Halep quarter tongogo

Paris, June 05 (Agencies): Britain nunger tebur tennis asayar, Andy Murray-i Karen Khachanov madak takok ngua French Open 2017 indang quarter-final tongtetogo.

World No. 1, Murray aser Russia nunger Karen Khachanov tsüngda ghonda ana-sür minute pezü asayaba nung Murray-i 6-3, 6-4, 6-4 agi akok.

Arishi küm 30 tain, Murray ya quarter nung World No. 8, Kei Nishikori den asayatsü.

Iba asaya akokba sülen Murray-i tawa kiralongrar temi Manchester aser London nung lendong agütsüdang takoksa ajurur alir nem tetushi agütsü.

"Hopta ishika tsüngda London aser Manchester nung lendong tesashi ajuruogo. Paris nunga taoba küm ishika tsüngda nung yamaji lendong ajangshiogo aser ni amanger, iba lendong agi kongshir alir atema bilemba aser sarasademtsüba nung nisung ajaki adentsü," ta pai ashi.

"Iba lendong ajanga Europe aser alima ajunga nung aliba tesem aika nung kongshiogo. Aji süaka nenok ajaki arua onok pusemba asoshi pelar aser nenok jakdang asayatsü kü nem maongka agütsüba asoshi kanga pelar," ta pai-sa shisem.

British nunger tennis tebur kija asayari French Open akokba ya 1935 küm Fred Perry-i dang koka lir.

2017 French Open tetsür kija tennis asaya nung Simona Halep quarter final tongtetogo.



Andy Murray



Simona Halep

Lai Carla Suarez-Navarro madak 6-1, 6-1 agi takok angu.

Iba tournament nung tetsür kija tennis asayartemi taoba mapang French Open koka alir kata quarter final nung mali. Taoba mapang iba tournament akoker, Serena Williams mashisa aliba agi taküm masayateter aser Maria Sharapova iba asayamong nung shilem agitsü maongka magütsü.

Simona Halep ya quarter final nung Ukraine tsür, Elina Svitolina den asayatsü.

Elina Svitolina ya Croatia tsür, Petra Martic madak 4-6, 6-3, 7-5 agi takok ngua French Open 2017 quarter-final tongtet.

Eden Hazard tempu teloktep raksa. Ita pezü masayatetsü

Brussels, June 5 (Agencies): Chelsea aser Belgium international asayar Eden Hazard tempu teloktep raksaba osang Belgian football federation ajanga Deobarnü jangjatsüogo.

Arishi küm 26 tain Hazard par linük team den training agiba mapang pa tetsüng raksa

asera iba ajanga Hombarnü Czech Republic den friendly asayatsü aliba aser Hokolbarnü 2018 World Cup qualifier Estonia den asayatsü aliba nung shilem magitetsü.

Par national team tweed ka nung yamai shia liasü, "Medical image ajanga @hazardeden10 tetsüng tachichi tempu

teloktep lokteter aliba sayuogo."

Hazard shibai Chelsea pur taoba seasong nung Premier League title akokba nung tongtibang shilem agi pa Hombarnü surgery agitsü aser ita pezü shi asaya nung shilem magitetsü akok, ta osang ka ajanga metetdaksü.

WED nung DMC-i dustbins...

(TAPAK 1 NUNGI...)



Hombarnü Geoffrey Yaden aser tangartemi tenangzükba agidang tangokba noksa angur.

Sentong nung DMC, CEO, Moa Sangtam-i yokba osang Dr. Sentimoa, Vas, DMC-i zünga metetdaksü.

Swachh Bharat Mission indang alizüngji asen yimti merükmejua ayutsüba lir aser ibaji mapang tatsüka lir solid waste management maparen inyakba ajanga inyaktetsü, ta Moa Sangtam-i ashi.

DMC-i bendanglen nungi bener aruba technology amshia recycle plant ka yanglutsü aser

ibaji ajanga jana recycle asütsü saka tzümpung memenentsü. Iba mapatong ya nübortemi yaritep nungdang takok angutsü anungji ajaki DMC den yaritepsü aser colony tem nung waste management indang osang prokshitsü ayongzük, ta DMC CEO-i shisem.

Tanü sentong nung kiyong balala nungi ketdangser nem dustbin bundle teranana (12) lema agütsü. Tanü inyakba mapaji mezüngbuba shilem lir

asera bundle ka nung dustbin 72 lir aser itemji pei pei kiyong nung alemtsü.

DMC-isa colony/council züngsemtem dang tekaratiba nung pei pei kiyong nung kilen aliba osang agütsütsü metetdaksü.

Iba sentong nung DUCCF, DDCF, GB Union Dimapur nungi lennirtem aser taoba DMC züngsem Hokto-ia o jemi. Tatem nung SBM Nodal Officer, B. Bhadra-i anküp tepela o jemi.

Nagaland dena state ... (TAPAK 1 NUNGI...)

Yimtsüngtem nung aliba shirangertemi district hospital tem nung Antiretroviral Centres-i aoba anenogo, kechiyong parnoki idakji mozütem mangutsü ta metetbayong maoer aser parnok karibo treatment toktsüogo.

Taoba ita Lok Sabha nung HIV/AIDS (Prevention and Control) Bill 2017 agizüka mayudang, Union Health Minister JP Nadda-i tebang agi HIV positive nisungtem ajak angati anepalutsü ta shia liasü.

National Aids Control Organisation-i ashiba agi, mozütem aser diagnostic kits temadokbaji mapang tatsüka atema dang lir saka activist temi ashiba agi, CD4 kits ji joko ita trok tema mengui timtemer.

CD4 kits ji tawa tu aliogo aser CD4 machines indang jenjang atema tang tejembidak lir, ta NACO Deputy Director General,

Dr Naresh Goel-i ashi.

Ano külen, mozü temadokba atema NACO-i state ketdangsertem dak tai tongloksü. "Item state tem nung centre kar nung mozü kar maliba dang lir. Onoki State Aids Control Society tem dang mozütemji ajak kasa alemtsü tetuyuba agütsü" ta NACO Antiretroviral Therapy programme officer, Dr Manish Bamrotiya-i ashi.

HIV activist temi ashiba agi, National Aids Control Organisation aser state ketdangsertemi mozü aser diagnostics atema temulung magütsür.

"State ketdangsertemi NACO dang mozü magimidang osang sangoktsütsüla. Ajisüta, parnoki mozü agimaba sülen ang osang sangoktsür" ta National Coalition of People Living with HIV, national coordinator, Firoz Khan-i metetdaksü.

BILEMDANGANG

"Temelenshi asoshi nü teka lapokang, saka nü jenjang tesamadaksü".